



№66 (10056)  
20 тамыз,  
сейсенбі  
2024 жыл

# Жалағаш жаршысы



«zhalagash-zharshysy.kz»  
ақпараттық агенттігі

Аудандық қоғамдық-саяси газет

Газет 1934 жылдың 10 қаңтарынан бастап шығады

Егінжай – 2024

## Күрішке орақ салған күн



Өткен сенбіде Ауыл шаруашылығы министрі Айдарбек Сапаров пен облыс әкімі Нұрлыбек Нәлібаевтың қатысуымен Таң ауылының егіс алқабында алғашқы орақ түсу рәсімі өтті. Солтанатты шараға республикалық ардагерлер ұйымы төрағасының бірінші орынбасары, профессор Өмірзақ Озғанбаев, Парламент Сенаты мен Мәжілісінің депутаттары, барлық облыс әкімінің орынбасарлары мен ірі ауыл шаруашылығы құрылымдарының басшылары қатысты. Аймақ басшысы ізгі тілегін білдіріп, агросалада атқарылған жұмыстарға тоқталды.

– Ауыл шаруашылығы – аймақ экономикасын өрістеткен негізгі бағыттардың бірі. Оның ішінде аймақтың табиғи ерекшелігіне, ауа райы мен топырақ құрамына бейімделген негізгі дақыл – күріш. Соңғы жылдардағы су тапшылығының кері әсері Сыр диқандарына оңай соқпады. Осы орайда Мемлекет басшысы Қасым-Жомарт Кемелұлы мен Үкімет басшысы Олжас Абайұлының, Үкімет мүшелерінің бастамасымен Сырдария өзенінің жоғарғы ағысындағы мемлекеттермен дер кезінде келіссөз жүргізіліп, қолдау жасалды. Нәтижесінде егісіміз сумен толық қамтамасыз етілді. Сол үшін барша Сыр диқандары атынан шексіз алғысымызды білдіреміз. Вегетация кезеңіне бөкітілген су лимитіне сәйкес күрішті 84 мың 300 гектарға өктік. Жыл сайын аграрлық саланы қолдауға қомақты қаржы бөлінуде. Мемлекет басшысы ауыл шаруашылығының жалпы өнім көлемін 5 жылда екі есе ұлғайту жөнінде тапсырма бергені белгілі. Осы ретте егістікті ертарандыруға, су үнемдеу технологияларын қолданып егіс көлемін арттыруға ден қойылуда. Жеңілдетілген дизель отыны шаруашылықтарға мерзімінде жеткізілді. Диқан қауымы ауызбіршіліктің үлгісін көрсетіп, суды ысырапсыз пайдаланып, жоспарлы жұмыс жасауда, – деді Н.Нәлібаев.

Ауыл шаруашылығы министрі Айдарбек Сапаров жиналған жұртты құттықтап, атқарылған жұмыстарға оң бағасын берді, мемлекет тарапынан тиісті қолдау көрсетілетінін айтты.

Егін орағының басталуына арналған іс-шарада азық-түлік қауіпсіздігін қамтамасыз ету мақсатында республиканың әр өңірінен келген кәсіпорындардың келісімге қол қою рәсімі өтті. Нақтырақ айтсақ, «Шымкент» ӘКК АҚ мен «Жан-Арай» ЖШС, «Павлодар» ӘКК АҚ мен «Абай-Дәулет» ЖШС, «Алматы» ӘКК АҚ мен «Алтын Орда» ЖШС арасында меморандумға қол қойылды.

Шараға қатысушылар егін жинауға арналған ауыл шаруашылығы техникаларымен, облыста өндірілетін агроөнім түрлерімен танысып, мамандармен пікір алмасты. Сала ардагері Нұрлыбай Ұлықпанұлы батасын берді.

Айта кетейік, Сыр диқандары суды үнемдеу мақсатында соңғы 10 жыл көлемінде күріш егістігінің 55 мың гектарын лазерлік тегістеді. Ал

дағы 5 жылда бұл 72 мың гектарға жеткізіледі. Биыл су үнемдеу технологиясын пайдалану 4,4 мың гектарға жетті, алдағы 5 жылда оны 24,2 мың гектарға арттыру жоспарлануда.

Биыл «Таң ЛТД» серіктестігі қытайлық компаниямен бірлесіп, Шиелі ауданында 800 гектарға тамшылатып суару әдісімен дән жүгері өкті. 2025-2026 жылдары тамшылатып суарылатын егістік көлемі 3 мың гектарға дейін ұлғайтылады.

Сол сияқты Қазалы және Арал аудандарында ауқымды жобалар бастау алды. Арал ауданындағы «Кәмел Про» шаруа қожалығында 830 гектар жоңышқаны, Қазалы ауданындағы «РЗА Агро» серіктестігінде 184 гектар мал азықтық дақылдарды жаңбырлатып суару жобалары бар. Сонымен қатар делегация Таң ауылының әлеуметтік-экономикалық дамуымен танысты.

Айта кету қажет, «Таң ЛТД» серіктестігінің құрылтайшысы, Қазақстанның Еңбек Ері Имамзада Шағыртаев соңғы жылдары ауылдың әлеуметтік-экономикалық дамуына 1,5 млрд теңгеден астам қаржы бөліп, әлеуметтік нысандарды жөндеді. «Тағзым», футбол балалар ойын алаңдарын салып, жолдарды жаңғыртты, көшелерді жарықтандырды. Жалпы ауылдағы жобалардың басым бөлігі Еңбек Ерінің демешілігімен жүзеге асты десе де болады.

Биыл ауданда 37 365 гектарға ауыл шаруашылығы дақылдарын орналастыру жоспарланған. Жалпы Жалағашта 199 шаруашылық егін шаруашылығымен айналысады. Оның ішінде 152 шаруашылық күріш дақылын егеді. Олар қажетті жеңілдетілген бағамен жанармаймен, тыңайтқышпен қамтылды.

Иә, жыл сайын маусымда аяқсу тапшылығы диқандарға айтарлықтай мәселе болатын. Биыл аймақ басшысы айтқандай, көрші елдермен жасалған келісімдер арқасында мәселе туындамады. Оның үстіне жергілікті шаруашылықтар да егінді ертарандыруға басымдық беруде, яғни жерге себілгеннен жинап алғанға дейін суда ұстайтын дақылдарға қарағанда соя, мақсары, жүгері сынды басқа да дақылдарға басымдық берілген.

Кенжетай ҚАЙРАҚБАЕВ

Бағдарлама игілігі

## Шағын наубайхана шарапаты

Үлгілі ауыл Аққошқардың теп-тегіс асфальтталған көшелеріне тамсана жүріп, ауыл тұрғыны наубайханашының шаңырағына да келіп қалыппыз. Ыстық нанның жағымды иісі тәбетті ашып барады. Үйге кіргеннен-ақ ауылдың күйбең тіршілігіне көзің түседі. Қора маңында байланған бұзаулы сиыр тұр, жоңышқа мен мал азығы ұқыпты жиналған. Күбімен айран піскен өжеңің жанында бүлдіршін ойнап жүр. Бір сөзбен айтқанда, тыныштығы бұзылмаған жайбарақат қазақы ауыл өмірі көңілге қуаныш ұялатады.

Наубайханашы Фариза Әдиреева 2022 жылы «Бастау Бизнес» жобасы аясында «Атамекен» кәсіпкерлік палатасында оқытылып, мемлекеттен 6 пайызбен 3 млн теңге несиені алған. Тиісті қаражатқа Алматы қаласынан кәсіпке қажетті құрал-саймандарын алдырты. Осылайша кәсіпкеріміз «Әуелі Алла» деп кәсібін бастап кеткен.

Күнне 80 бөлше нан жабатын кәсіпкер тәтті нанмен бүкіл ауылды қамтамасыз етіп отыр. Фаризаның пісірген бөлше нанын Еңбектегі әр шаңырақтың дастарқанынан көруге болады. Оған қоса тәтті тоқаш, шөлпек, тауық етін пісіріп, дүкендерге өткізеді. Осындай киелі кәсіпті қолға алған кейіпкеріміз биыл мемлекет тарапынан тағы да қолдау тапты. Нақтырақ айтсақ, Фариза үкіметтен қайтарымсыз грант алып, бүгінде төрт бұзаулы сиырды қораға байлаған. Мақсаты – сүт бағытында кәсіп бастау. Қазіргі таңда сүт, айран, ірімшік, құртын ауыл дүкендеріне өткізіп, кәсібін бөреке тауып отыр.

– Нанды арнайы пеште пісіремін. Қауіпсіз әрі экологиялық таза. Мұнда әсіресе тазалыққа көңіл бөлемін. Қыздарыма күніне екі мезгіл тазалауды



міндеттегенім. Өйткені ас пісетін жер таза болуы керек. Кейде тазалықты тексеру мекемесінің өкілдері келіп тұрады. Бәрі талапқа сай. Нан пісіру оңай шаруа емес. Ауыл тұрғындарына ұнамай қалмасын деп барымды саламын. Ұнды ауылдан немесе аудан, облыс орталығынан алдыртамын. Бізде демалыс жоқ. Сенбі, жексенбі күні де істей береміз. Бір күн демалсаң, ауыл нансыз қалады. Кешке қарай нан таусылса, тұрғындар ренішін айтады.

Шүкір, өнімге сұраныс жоғары, – дейді наубайханашы.


Кейіпкеріміз келешекте кәсібін көкжиегін кеңейтуді мақсат еткен. Үлкен цех ашып, тек ауылды ғана емес, тұтас ауданды нанмен қамтамасыз етсем дейді. Сөзінің жаны бар, өйткені бүгінде аудан орталығындағы кейбір дүкендерге нан өнімдері облыс орталығынан немесе көршілес аудандардан жеткізіледі. Сондықтан өзімізді нан өнімдерімен қамтамасыз

ететін кәсіпкерлер қажет-ақ. Сонымен қатар кәсіпкер ауылдың жұмыссыз қыз-келіншектерін жұмыспен қамтығысы келеді. Бүгінде ол жергілікті әкімдікпен ақылдасып, екі азаматшаны жұмысқа алған.

Міне, шағын наубайхананың шарапаты бүкіл ауылдың экономикасына оң әсерін тигізіп отыр. «Еңбектің түбі – бөреке» деген осы болса керек.

Жандос ЖАЗКЕН

Ерлік



## Қырағы шекарашылар – қауіпсіздік кепілі

Күндіз-түні Қазақстан Республикасының мемлекеттік шекарасын күзетіп, арқашан Отанының мүддесін қорғау үшін өзінің әскери борышына адал болып қалатын азаматтардың мінсіз қызметі – қазақстандықтардың қауіпсіз өмірі, елдегі бейбітшілік пен тыныштықтың кепілі. Қазақстанның шекарашылар қойылған міндеттерді жоғары деңгейде орындап, кәсібилік, табандылық пен жауапкершілік танытады.

18 тамыз – шекарашылар күні. 5 мемлекетпен шектесетін Қазақстан достық пен татулықтың ерекше үлгісін көрсетіп отыр. Себебі 15 мың шақырымнан асатын шекара бойында антақ берік, рухы асқақ қыз-жігіттер өңбек етеді.

ҚР ҰҚК Шекара қызметіне биыл 32 жыл, ал Қызылорда облысы бойынша департаменттің құрылғанына 25 жыл толып отыр. Отанға мінсіз қызмет етіп, әскери құрылымның қалыптасуы мен өркендеуінде департаменттің әр әскери қызметкерінің қосқан үлесі орасан. Қиын-қыстау кезеңдерде түпкі-тамырынан көз жазып қалмай, табандылық таныта білді. Қазіргі таңда әскери-патриоттық қозғалыстың қатарында 300-ге жуық жас шекарашы бар. Ол Қызылорда қаласы, Шиелі, Қармақшы аудандарындағы шалғай бетте орналасқан мектеп пен колледждерде құрылған.

Сонымен қатар қазіргі уақытта департамент облыс төңірегіндегі НЕЕТ санатындағы жастардың санын азайту мақсатында әскер қатарына жастарды толықтыру жұмыстарын жүргізуде, яғни әскери борышын өтеп келген жас сарбаздарды келісім-шартпен және жоғары білімі бар әскери кафедраны тәмамдаған азаматтарды белсенді түрде жұмысқа орналастыруда.

Ерлан СОЗАҚБАЕВ





